

Kalaallit eqqumiitsuliaannut nunatta eqqumiitsulianik saqqummersitsiveqalernissaa pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortamit Múte B. Egede, Inuit Ataqtigiit saqqummiunneqartoq)

pillugu

Ilinniartitaanermut, kultureqarnermut, Ilisimatusarnermullu Ilageeqarnermullu
Ataatsimiititaliap

ISUMALIUTISSIISSUTAA

Siunnersuutip aappassaneerneqarnerani saqqummiunneqartoq

Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Vivian Motzfeldt, Siumut, siulittaasoq
Inatsisartunut ilaasortaq Peter Olsen, Inuit Ataqtigiit, siulittaasup tullia
Inatsisartunut ilaasortaq Ineqi Kielsen, Siumut
Inatsisartunut ilaasortaq Poul Hansen, Demokraatit
Inatsisartunut ilaasortaq Mimi Karlsen, Inuit Ataqtigiit

UKA2016-ip ingerlanerani ulloq 7. oktober 2016-imi siullermeerinninnerup kingorna
ataatsimiititaliap siunnersuut misissorpaa.

1. Siunnersuutip imarisaa siunertaalu

Nunatsinni eqqumiitsuliornermut saqqummersitsivimmik pilersitsisoqarnissaanut
suliniuteqaqqullugit Naalakkersuisut peqquneqarnissaat siunnersuut manna aqqutigalugu
siunnersuuteqartup kissaatigaa. Ingerlatsinermut tapiissutinik imaluunniit pilersitsinissamut
aningaasaleeqataanissamik naalakkersuinikkut neriorsuisoqarnissaanik kissaateqarneq
siunnersuutip tunngavilersuutaani pingaartinneqarpoq.

2. Siunnersuutip inatsisartuni siullermeerneqarnera

Siunnersuutip siullermeerneqarnerani nunatsinni eqqumiitsulianut saqqummersitsivimmik
pilersitsisoqarnissaa tunngaviatigut nalinginnaasumik tapersorsorneqarpoq. Taamaattorli
aningaasalersuinikkut nunatta karsia qanoq annertutigisumik akissussaaqataatinneqassanersoq

isumaqatigiinngissutaalluni. Nunatsinni eqqumiitsulianut saqqummersitsivimmik pilersitsinissaa Naalakkersuisut tunngaviatigut tapersersorpaat. Taamaattorli Naalakkersuisut aningaasatigut tapiissuteqarnissaq eqqarsaatigalugu taamaallaat ingerlatsinermut tapiinissamut neriorsuisinnaapput. Siunnersuut ataatsimiititaliamut sularineqartussanngorlugu innersuunneqarpoq allannguutissatut siunnersuummik saqqummiussisoqarnissaanut periarfissaqarnissaa kissaatigineqarluni.

3. Siunnersuutip ataatsimiititaliami sularineqarnera

Soorlu Naalakkersuisut akssuteqaamminni allassimagaat, nunatsinni eqqumiitsulianut saqqummersitsivimmik pilersitsinissaq pillugu oqallinneq nutaajunngilaq. Ukiuni kingullerni qulikaani tapiissutaasinnaasut assigiinngitsut tapersersuinerillu politikkerit, soqutigisaqaqatigiit, kommunillu akornanni eqqartorneqartarput. Tapersersuinissaq pillugu oqaatigineqartartut ataatsimut katersorneqarnerisigut tunngaviatigut nunatsinni eqqumiitsulianut saqqummersitsiviup kingusinnerusukkut piviusunngortinneqarnissaanut siunnersuut manna aqutissatut ataatsimiititaliamit isigineqarpoq.

Nunatta oqaluttuarisaanerani, piorsarsimassusaanik kiisalu piorsarsimassutsikkut kingornussat siunissami uppersarsasorneqarnissaanut annertunerusumik nunatta nammineq siunissami peqataanerulernissaanut nunatsinni eqqumiitsulianut saqqummersitsivik aqutissieqataassasoq ataatsimiititaliamit nalilerneqarpoq. Taamaalilluni nunatsinni eqqumiitsulianut saqqummersitsiveqalernissamut politikikkut tapersersuineq atatsimiititaliamit tunngaviatigut isumaqataaffigineqarpoq.

Nunatsinni eqqumiitsulianut saqqummersitsivimmik pilersitsineq siunnersuut naapertorlugu 200 mio. kr. tungaanut akeqassaaq. Siunnersuummi matumani tunngavilersuut malillugu minnerpaamik politikikkut neriorsuisoqarnissaa siunnersuumi matumani pingaartinneqartoq ataatsimiititaliamit paasineqarpoq. Taamatut neriorsuineq ilaatigut pilersitsinermut aningaasalersueqataaneq, ingerlatsinermut tapiissutit imaluunniit politikikkut tunngaviatigut tapersersuisoqarnera aqutigalugit pisinnaavoq. Saqqummersitsiviup pilersinneqarnissaanut aningaasalersueqataanissaq inatsisartuni amerlanerussuteqartunik tapersersorneqanngitsutut isikkoqartoq paasinarsivoq. Tamanna siullermeerineri paasinarsivoq.

Naalakkersuisut siullermeerineri akissuteqaataat naapertorlugu nunatsinni eqqumiitsulianik saqqummersitsivimmik Naalakkersuisut tapersuutissaasa annertussusissaanut atatillugu ataatsimiititaliap paasinninnini matuma kinguliani nassuiaateqarfigaa,

Naalakkersuisut tapersiinissaanni ilaappput:

1. Uku piumasaqaatigalugit ingerlatsinermut tapersersuinissaq neriorsuutigineqarsinnaavoq
 - Nunatsinni eqqumiitsulianut saqqummersitsiviup sanaartorneqarnera aningaasaateqarfinit aningaasat atorlugit sanaartorneqarsinnaappat aamma sanaartorneqassappallu.

2. Suliniutip sanaartortitsisutullu inissisimanerup makkuninnga piumasaqaatitalimmik tiginissaat:
 - Pilersinneqarnissaata aningaasalersorneqarnissaa inissinneqarpat inissinneqassappallu
 - Suliniutip sananeqarnerani 200 mio. kr.-inik missingersuutit qaangerneqassappata suliniutip nalimmassarneqarnissaanut periarfissaqassappat

Naalakkersuisut tapersiinissaanni ilaanngilaq:

1. Nunatsinni eqqumiitsulianut saqqummersitsivimmik pilersitsinermut aningaasalersueqataanissamik neriorsuut.

Tamatununga atatillugu Naalakkersuisut akissuteqaatiminni paasissutissiipput.:

” Taamaammat qulaani taaneqartunut tapiliullugu AIS 2017-ip aappassaaneernejarnerannut kontomut pingaarnermut 40.94.12-imut Nunatta Katersugaasivia Allagaateqarfialu, oqaaseqaatinut allannguutissatut siunnersuummik Naalakkersuisut saqqummiiniarput, tassani Nunatta Eqqumiitsulianik Katersugaasivianik tamakkiisumik aningaasalersorneqartumik sanaartornermik tigusinissamik neriorsuuteqartoqassalluni. ”

Kalaallit eqqumiitsuliaannut nunatsinni saqqummersitsivimmik pilersitsisoqarnissaanik periarfissap siuarsarneqarnissaa inatsisartuni amerlanerussuteqartut Naalakkersuisullu tapersersorukkaa ataatimiititaliamit paasineqarpoq.

Tamanna tunngavigalugu tunngaviummik tapersiinermik imalimmik kiisalu Naalakkersuisut tapersiissutitut piviusunngortikkumasaannik periarfissiisumik allannguutissatut siunnersuummik saqqummiussinissaq ataatsimiititaliap kissaatigaa.

Naalakkersuisut tapersiinissamik neriorsuutigeriigaata piviusunngortinneqarnissaanut kiisalu nunatsinni eqqumiitsulianik saqqummersitsiviup sanaartorneqarnissaanut allannguutissatut siunnersuut immikkoortoq 5-imi allasimasooq periarfissiisaaq.

Tamatumalu peqatigisaanik allannguutissatut siunnersuut ima paasineqassaq, sanaartortitsisutut atuuffiup suliniutillu tiguineqarnissaat eqqarsaatigalugu Naalakkersuisut tungaanit piumaqaatitut kissaatigineqartoq killilersorneqassanngitsoq.

4. Siunnersuutip aningaasatigut kingunnerisassai

Inatsisartut suleriaasianni § 33 imm. 1. Allassimavoq aalajangiiffigisassatut siunnersuutitut allaffissornikkut aningaasatigullu kingunissartinneqartut siunnersuutip tunngavilersuutaanut ilanngunneqartarnissaat

Tamatumunnga naapertuuttumik siunnersuutip piviusunnngortinneqarnerani aningaasatigut kingunissartinneqartut siunnersuutaqaartumi ilanngunneqarsimasut ataatsimiititaliamit maluginiarneqarpoq. Naalakkersuisut qanoq tapersersuinissaannut aningaasatigut kingunissartinneqartut sorlerpiaassanersut apeqqutaasaaq. Taamaalilluni pineqarput ingerlatsinermut tapiissutit ukiumut 5 mio. kr.-iusussatut naatsorsuutigineqartut imaluunniit pilersitsinermut aningaasalersueqataassutit ataatsimut isigalugu 200 mio. kr.-nik annertussuseqartussatut missingerneqartut.

Ataatsimiititaliap allannguutissatut siunnersuutaata oqaasertai eqqarsaatigalugit tamatuma kingunerisavaa nunatsinni eqqumiitsulianut saqqummersitsivik pilersinneqassappat Naalakkersuisut 5 mio. kr.-inik ingerlatsinermut tapiissutissatut neriorsuutigisaasa piviusunnngortinneqarsinnaanerit. Allannguutissatut siunnersuut malillugu nunatsinni eqqumiitsulianik saqqummersitsivimmik pilersitsinissami Nunatta Karsiata aningaasalersuinikkut akisussaaqataanissaani Naalakkersuisut aningaasaleeqataanissamik nammineq kissaateqarnerat apeqqutaasaaq. Naalakkersuisut aningaasalersueqataasinnaaneq taamaattoq itigartereerpaat, taamaatumillu allannguutissatut siunnersuutip Namminersorlutik Oqartussat sanaartornermut aningaasartuuteqarnerannik kinguneqarnissaa naatsorsuutigineqanngilaq

Oqaatigineqassaaq nunatsinni eqqumiitsulianik saqqummersitsivimmut kommunit aningaasaliissinnaanerit siunnersuutaqaartumit imaluunniit allannguutissatut siunnersuummit matutinngimmat.

Pisortat allaffisorneranni kinguneqaatissatut oqaatigineqarsinnaasoq tassaavoq, pilersitsinermut aningaasartuutit avataaniit, assersuutigalugu aningaasaateqarfinit aningaasanit aningaasalersorneqassappata Naalakkersersuisut suliniummik sanaartortitsisutullu atuuffimmik tiguneqarnissaat allannguutissatut siunnersuutip nassatarissassaattut naatsorsuutigineqarmat. (piumasaqaat eqqaaneqartoq malillugu)

Namminersortunut aningaasatigut kingunissartinneqartunut tunngatillugu eqqaaneqarsinnaavoq nunatsinni eqqumiitsulianik saqqummersitsivimmik pilersitsinissamut aningaasaliissuteqassagunik tamanna namminersortut nammineq kissaateqarnertik tunngavigalugu ingerlassinnaagaat. Tamanna ataatsimiititaliamit allannguutissatut siunnersuummi mattussinani allannguinnngilaq.

5. Ataatsimiititaliap inassuteqaatai

Ataatsimiititaliap **isumaqatigiittup** allannguutissatut siunnersuut imaattoq saqqummiuppaa:

”Kalaallit eqqumiitsuliaannut nunatta eqqumiitsulianik saqqummersitsiveqalernissaanut periarfissanik siuarsaanissamut, tassungalu ilanngullugu avataanit aningaasalersuisoqarnissaata periarfissarsiuunnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut.”

Allannguutissatut siunnersuut **akuerineqassasoq** ataatsimiititaliap isumaqatigiittup **inassutigaa.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Vivian Motzfeldt

Siulittaasq



Peter Olsen

Siulittaasup tullia



Ineqi Kielsen



Poul Hansen



Mimi Karlsen